



## E rigal ad Nadel

“ E rigal ad Nadel...”

L'era arvat ormai Nadel e la Giana me marid  
L'ai vuliva propia fe per rigal un bel vistid  
Da nascost senz a dii gnint  
Dop tent'an ch'iera cuntint  
Cl'umarein elt se e na  
quant d'un bo la su mità  
ma la moi s'ti pi al scarpeti  
ui arviva sgues mal teti  
una copia isè asurtida  
che fen n'enta l'er fadiga  
quant insein iandeva a mesa  
lo a bracet tot stret ma nesa  
l'era sobti un bagajè  
ad la zenta ch'steva drè  
“Guerda, guerda che gighent,

sa che nano ad Sancliment...  
iè na copia tent perfeta  
che la per taied sla sgheta...”  
Ma cal ciacri da paes  
Lor in deva nisun pes...  
Ma turnema me vistid  
Che la moi me su marid  
Lai va a to po se marchè  
Ad Curien un merculdè  
Quant la curva po l'imboca  
Uiè un umon se zigri ad boca  
E lai dis: “ Oh gi cl'omm, a si vo ca vindì i pan ?”  
“Se, a sò me da pio ad trent'an,  
s'uv serves qualcosa ad bon  
guardè po dreint te furgon...”  
Finalment forza ad zarchè  
Un vistid l'ha po truvè  
Una giaca scura a righi  
E i calzun sa do bel pighi  
“Gi po sò o e mi padron  
L'è po vera cl'è ad pan bon,  
an vuria che dop s'iann  
e fases cumè chi pan  
che i dventa strusci e lis  
cumè i col a dal camis  
La mi dona, ste tranquela  
che at chi pan an vendrò mela  
e nisun mai i s'è lament  
e tot quant iè ste cuntent !!!”  
La vigiglia de Nadel ech la Giana se rigal  
Tot pighed at un foi zal  
Las presenta me su om  
Che zet, zet a t'un canton  
E fumev tranquil la pepa  
Thendla stret a sla men reta  
“ Di Zvanein , vin po iquè  
Ca iho un bel rigal per te...”  
E lo u s'volta s'un suris  
“ Guerda , guerda se po ut pis !”  
E arvend pien, pien che pach e vistid cla sera  
A te lom e per che lusa cumè fos perdavera  
Che vistid da spos d'alora  
Quant tot do ier zovni ancora  
Ma Zvanein che bel rigal ui fa amni la pela d'oca  
E da l'emozion ui selta via la pepa d'boca  
E cumè quant cl'era znin  
l'occ is bagna un bisinin ...  
E de dop cl'era e Nadel  
I do spus sota l'umbrel  
I va a mesa ma la cisa  
Lo vistid s'giaca e camisa

E na gran gravata e col  
Calzun scur s'un bel risvolt  
Cl'umarein pareva ades  
E più bel cui putiv es  
Sa cla sbanzla che lo a feva  
Quant dri lia e camineva  
Che e pareva cridim pò  
Arturned tla gioventò  
Quant tot do po finalment  
Ma la cisa ad Sancliment  
I s'apresa ma la porta  
tot la zeinta un la volta  
is fa in la per dei e pas  
com pases do bei ragaz  
e po dop un mormurì  
che un s'era mai santi  
tot a fes gran meraveja  
per chi do, per cla fameja  
perchè che rigal d'Nadel  
l'eva ardot Zvenein sgues... bel  
A giri cl'è na sturiela  
E po es... ma sla murela !!!

Luciano Monti Natale 2014

[Read More](#)

---